

閩媛典第二百九卷

閩節部列傳九十一

明八十六

王桓妻李玉真

洪氏附

按安溪縣志李玉真李森女晉江庠生王桓妻桓亡玉真年二十所生二子熾燿皆幼未幾熾復殤玉真母諷其改適真引刀自刎妾洪氏趨抱持之遂從玉真守節撫孤各年六十餘卒熾爲廣文好禮醇厚有名鄉人號李氏曰冰介洪氏曰節介萬曆間旌表

詹璣妻林玉修

陸大妻何觀奴

林彬野妻徐氏

按安溪縣志林玉修諸生詹璣妻夫亡子清在襁褓源方娠翁姑憐玉修貧苦諭使再嫁氏哀慟不已曰我乃爲兩家媳婦耶源後登第旌表
按安溪縣志何觀奴陸大妻年十六歸陸大未幾大亡矢志苦節事姑教子終其身
按安溪縣志徐氏林彬野妻野沒徐年二十二紡績拮据以鞠

幼子子殤熒熒孤守終身不渝

林鳴盛妻鍾氏

楊魁杰妻詹氏

按安溪縣志鍾氏孝廉林鳴盛妻于歸克盡婦道鳴盛登賢書未幾而沒無子氏哀毀守節勤儉經營畢葬祭終其身如一日 按安溪縣志詹氏楊魁杰妻魁杰溺死詹年二十二哭三日得屍歸葬如禮姑憐其少諷之改行不從孀居五十餘年終

李仲良妾林氏

按安溪縣志林氏李仲良妾良妻無出林生子則成良及妻相繼歿林無所依攜幼子與仲良女婿鄭存忠同居時方少因自割鼻以全節後則成以人材舉

黃驚妻蔣氏

按安溪縣志蔣氏黃驚妻驚家世單弱蔣年二十二未生子薦妾於驚勸驚行義以廣後嗣未幾蔣生子大本而妾亦生子大任蔣均哺之夫沒遣大本入莆從林兆恩學歸則必問其業而使大任習武事任從軍有功二子欲以其節聞輒不許遂莫有聞者

詹鳳翔妻黃氏

按安溪縣志黃氏黃驚女詹鳳翔妻年十八翔病氏事之甚謹不五載翔沒氏年二十三有身七月

對夫靈自矢曰所不死者冀萬一延一脈耳已生子麟苦守之兄弟六人同居不聞其聲卽妯娌不甚相見後麟爲諸生輒召誨之曰吾不死爲汝善自愛

徐維妻王氏

按漳州府志王氏龍溪人漳州衛百戶徐維妻夫亡無子妾鍾氏有娠已而生男王撫之如己出事姑李氏三十餘年小心敬愛營葬四喪嫡庶相守以沒齒子英孫襲職中武科進士

程阿雲

按漳州府志程阿雲漳浦副使應龍孫女年十六許字大學士林釭子淳淳天女聞訃悲號兄以他辭慰之女曰此身旣已許林豈容或有他志吾其往也乃縞素詣林朝夕慟哭林之族無不哀之者立其姪爲嗣里人王仍縉爲之賦孔雀

徐循介妻陳氏

林裕妻陳氏

按漳州府志陳氏漳浦徐循介妻年二十四夫亡遺腹生男潛抱歸母家矢志堅守年六十二終

按漳州府志陳氏鎮海林裕妻夫亡氏年二十事舅姑三十餘年始終勤謹身老無歸丐一子畜之

以承夫祀

王虞德妻黃氏

郭士侗妻陳氏

按漳州府志黃氏龍溪王虞德妻年二十八夫亡孀居不妄言笑鄉族以爲楷範年九十一終同安林希元爲著貞淑篇 按漳州府志陳氏龍溪郭士侗妻歸踰年侗沒遺腹生子復殤陳屢欲自決舅姑慰解之強弗死妹適於謝其夫亦沒相勉苦節年三十二以哀毀病亡

黃世承妻林氏

陳氏附

按漳州府志林氏龍溪黃世承妻年二十四世承沒子巨新甫二歲林事繼姑錢氏惟謹資紡績以給衣食後巨新又早亡媳陳氏年二十六亦矢志如姑姑媳形影相弔歷五十餘年林年八十九陳六十八號曰雙節黃家

蔡一清妻黃氏

黃弘妻鄭氏

按漳州府志黃氏龍溪蔡一清妻年二十夫亡子方六月氏事舅姑以孝聞苦節四十年終萬曆間奉詔旌表 按漳州府志鄭氏龍溪生員黃弘妻夫亡家徒四壁母欲嫁之斷髮自誓終身不歸

姑死躬負土埋葬年五十六終

顏光魯妻丘氏 蔡一松妻林氏

按漳州府志丘氏龍溪顏光魯妻年二十三而寡母令改嫁斷髮爲誓翁姑沒喪葬拮据盡禮年六十九卒 按漳州府志林氏龍溪蔡一松妻年二十七夫亡矢志撫孤年七十七終

陳珦妻胡氏

按漳州府志胡氏龍溪陳珦妻年二十而嫁方娠夫死哀痛絕食誓不獨生里婦勸之曰有身五月矣若生男陳不絕祀或女死未晚也胡乃祝曰陳宗絕乎生女吾死之不絕當生男旣而生男家貧淡薄胡不辭艱難撫育成立縣令旌之年九十三卒

王嘉園妻李氏

按漳州府志李氏龍溪王嘉園妻年二十二而寡無出立夫兄子璵爲後璵未婚而天李矢志益堅年七十一終璵妻吳三姐自縊死

蘇可教妻胡氏

按漳浦縣志胡氏戶部郎中文耀女儒士蘇可教妻年二十二可教應試溺水死胡求得其屍抱而親沐慟絕欲死念子民俊甫六月忍死撫育及民俊登萬曆壬辰進士授戶部主事上疏陳情奉詔旌表

沈汝棟妻劉氏

按漳浦縣志劉氏生員沈汝棟妻歸沈佐夫力學事舅姑盡孝年二十二夫疾朝夕籲天祈以身代夫亡慟絕欲死舅姑強起之爲立嗣居家不踰房閨坐臥惟在柩側雖至親罕覩其面年七十餘終萬曆二十六年旌表

丘鍵妻陳瓊姑 翁朝妻劉巽姑

按龍巖縣志陳瓊姑儒士丘鍵妻鍵早亡子僅二歲陳孤苦勵志紡績訓子成立萬曆間縣令表其門
按龍巖縣志劉巽姑生員翁朝妻朝亡劉方有身慟幾死翁姑泣勸爲兒存後未幾生子龍州艱辛自守歷久無變萬曆壬辰縣令表其門

郭泰妻陳氏

馬氏許氏附

按詔安縣志陳氏南詔所千戶郭泰妻年十八夫亡矢志撫遺腹子繼繼紉自給繼長生子良弼未襲職而沒良弼子藩襲職未幾又亡弼妻馬氏藩妻許氏竝守節如陳郡守旌表

林彥珮妻張氏

按詔安縣志張氏林彥珮妻珮亡氏年二十五撫幼子大輅事舅姑以孝聞舅姑沒爲負土築墳十指盡血族人利其產欲嫁之氏晝夜號哭哀動路人苦節六十年卒大輅方殮母賊猝至人人驚竄輅獨護喪號泣頃之颶風作寇護舟遁以此得免人謂節孝之報云

高尙賢妻陳氏

按詔安縣志陳氏懸鍾所高尙賢妻年十六歸高翁亡姑老與夫挽車提甕共事姑賢沒氏年二十
五撫三女及遺腹子欽苦節傭績織養姑姑亡鬻女爲殮富室慕其賢聘之不能奪欽長事母亦至
孝

楊敬妻黃氏

按詔安縣志黃氏年十七歸楊敬二十三而寡或勸嫁富室泣曰有子三週可望其長又幸有園二

古圖書集
畝可以療飢安適爲常廢午炊辦燈火以教子年七十有二孫觀吉捷南宮

周士達妻林氏

按海澄縣志林氏周士達妻隆慶庚午士達赴省試溺死林欲躬往求屍舅姑不可命長子往竟不獲坐臥一席地積淚漬磚久之隱隱有血迹三十餘年不出戶庭子尙德領萬曆辛卯鄉薦學使旌其門

周學樂妻陳氏

洪氏附

按海澄縣志陳氏周學樂妻學正周一陽媳也樂弟學射從父任盱江沒又三載學樂亦亡射妻洪氏與陳妯娌同庚相依共守各勤紡績以供甘旨洪氏子起元成進士爲名臣而洪已不及見陳氏子起龍爲南昌別駕陳得祿養直指李凌雲疏聞詔建坊旌表

江必鸞妻李氏

郭氏高氏連氏附

按海澄縣志李氏江必鸞妻鸞沒撫幼子周楫比長娶婦郭氏楫又亡李慟弗勝郭氏力慰姑願終事餘年姑婦遂相依以老縣令陶鎔贈以穀帛表其門同時有鍾廷瑜妻高氏早寡守二子二人長

以勵娶連氏亡何以勵天折連亦守節如姑

江光彩妻謝八娘

按海澄縣志謝八娘江光彩妻贈中憲謝君禮女光彩家貧遠客萬曆癸卯呂宋曾戕殺華人無數光彩死焉八娘聞訃哭幾絕姑及祖姑勸慰之撫遺腹子成立荼苦備嘗祖姑及姑後先沒皆謝力謀營葬

魏統妻王氏

按海澄縣志王氏同安人年十八適魏統事姑至孝姑亡明年夫亦沒氏慟絕復生者數子呈鑄甫三歲暴叔思甘心焉乃徙依母家賃空山草舍以居課其子讀書學稍懈輒自刺其掌子爲驚奮比呈鑄補邑諸生氏乃歸故居營夫葬而終老焉晚歲施砌文江石路半里許所坐紡績處終歲不離人至起立慰勉之比去輒還坐如初其貞靜類如此年七十餘縣令旌之

李任祿妻石氏

按海澄縣志石氏李任祿妻夫死遺孤世奇方九歲氏備十指教之小過必懲迨成進士入中祕以

母老乞歸終養鄉里欲以母苦節上聞母愀然謂其子曰婦事夫猶臣事君適際其難故爾何節之有且汝幸通籍於朝天之報我不薄矣若復受旌人將謂以庶常之母故也汝其求庶人妻之苦節者以闡潛德可耳會有疏薦其子者并及母節乃得旨勅本縣月給白米一石爲母膳時年九十二又二年卒

陳大貫妻蔡氏

按海澄縣志蔡氏陳大貫妻適貫五載克備婦道夫爲族蠹凌毆嘔血死蔡誓以身從自縊者數小姑輒防護救解且勸曰嫂獨不念幼姪乎乃止家貧紡績供衣食課子通經逢夫忌辰必設血衣號慟如初喪有司表其門以壽終

廖志光妻羅氏

按寧洋縣志羅氏廖天瑞長媳志光妻也光艱於子僅生一女遂亾民事舅姑以孝聞丁酉天瑞舉於鄉授新昌縣令氏隨之任撫女及笄配江右宗室後數年天瑞致仕其女欲迎氏就養泣勸勿歸氏曰汝母不死蓋爲舅姑耳且汝之外祖母在寧洋吾雖居此安乎汝欲養母乃使不安可乎卒隨

舅姑歸里縣令表其門

張志穆後妻林靈金

按平和縣志林靈金張志穆後妻穆先娶鄭生一女二子林皆愛撫之穆亡林年二十七所生子六歲其伯翁與其姑李氏謀逼嫁之林慟絕復甦曰死而已復何言李與伯翁已受富人聘不能復還林走懇族老之解事者百端曉李李悔竟還聘李沒爲築墳夫與前妻俱葬焉拮据辛勤教三子成立皆友愛

張淵妻戴氏

按平和縣志戴氏木場人小溪張淵妻淵亡戴年二十五無子舅姑微探其意戴欲赴水死以救免屏居一室足不踰閭雖子姪希見其面苦守五十年始終一節

張鳳妻潘氏

按平和縣志潘氏龍溪人諸生張鳳妻鳳疾篤語潘曰汝盛年遭此奈何曰君無慮決不相負也鳳沒潘年二十二無子舅姑相繼去世娣姒以白於族人爲請立嗣終其身

張國材妻李氏

按平和縣志李氏西山人小溪張國材妻年二十五材死姑病喪明懼無所依朝夕泣李溫言慰姑善事之數年姑歿貧不能治具族人爲葬之年八十卒

林碧玉妻王氏 朱明貴妻曾氏

按平和縣志王氏雲霄前塗人林碧玉妻玉亡壬年二十三子遺腹舅姑垂白遭凶年忍饑寒苦守年六十教子爲諸生 按平和縣志曾氏在坊人龍潭朱明貴妻年二十二夫亡守四歲孤仕業時祖姑及姑俱寡居氏事之終老仕業生四子二爲諸生

李廷仰妻戴氏

按平和縣志戴氏木場人李廷仰妻夫亡年二十三欲以身殉念遺孤思賢甫四歲無所依乃矢志撫育思賢長入邑庠未幾思賢又歿婦張氏痛其夫餓而死孫正心方七歲戴又躬勤撫養兩世存孤艱難萬狀及孫成立而卒

李能梁母許氏

按平和縣志許氏貢士李能梁母年二十九生四子而寡粵寇張璉作亂屋產盡廢乳孤在懷孀居教四子俱列黌序三貢大廷年九十三見其孫光熙成進士

陳士選妻吳氏

吳同愛妻葉氏

按平和縣志吳氏漳浦人雲霄陳士選妻士選早有文名苦學病羸死吳年二十七甘貧事繼姑教子默克繼先業 按平和縣志葉氏玉橋人僉事龜峯女年十八適西林吳方伯曾孫同愛愛亡葉屢欲死幸遺腹生男曰吾可無死以存孤也苦守十五年足不踰閭年三十五卒

雷吟龍妻楊氏

按寧化縣志楊氏楊天毓女雷吟龍妻年二十生子世儉未離襁褓而吟龍病篤與訣曰修短固命而家貧子幼奈何楊泣曰君之遺體妾之續命也生死視此矣吟龍遂瞑楊安貧撫子辛苦備嘗年八十四卒御史旌之

吳仁安妻黃氏

吳時發妻張氏

按寧化縣志黃氏吳仁安妻年二十三夫沒遺孤立麟殊幼黃號慟絕食誓以死從姑勸以立孤存

祀爲大乃稍進漿水毀容憔悴至老足不踰庭御史旌之 按寧化縣志張氏諸生吳時發妻年

二十四夫亡矢志撫幼子元俊俊由明經爲武進丞張年八十七卒御史旌之

施壽全妻寧氏 鄒欽相妻雷氏

按寧化縣志寧氏施壽全妻年二十四夫亡遺孤澤民熒熒無依寧矢志撫孤年八十二卒御史旌之 按寧化縣志雷氏諸生鄒欽相妻年二十四而寡撫孤三十年坐不易方縣令旌其門

雷廷種妻伍氏

按寧化縣志伍氏雷廷種妻未歸而種染疾殘廢無復人道遂請罷婚伍堅執不從竟歸種扶侍夫疾不避垢穢越十四年而種沒或諷再嫁伍太息曰人之癡愚乃至於此昔雷氏罷婚吾年二八耳此時不歸雷誰強我者但以義不可絕食苦至今日尙爲此言不亦俱乎於是人益欽之年六十餘卒

黃美金妾金氏

按寧化縣志金氏主簿黃美金妾兵馬司指揮黃恩官母也萬曆三十四年以皇太孫生上聖母徽

號加恩在內臣工恩官嫡母鄒氏獲贈孺人恩官復具疏陳情乞恩施母苦節其略曰臣生母係京衛指揮金見之女年十六歸臣父黃美金生臣三歲而臣父病篤治命謂嫡母鄒曰必嫁金氏彼年少難待子長也臣生母聞之悲慟拜牀下曰所不與嫡字而子者鬼神殛之臣父口稱難難而目遂瞑生母絕水漿者七晝夜臣嫡母諭之曰子幼予旣耄汝又絕食子誰依乎激一時之性以絕宗何忍于是始進水漿哀毀骨立見者驚爲人腊自是不離嫡母左右燃燈辟繡夜分不寐啣植微軀愛勞兼薦賴以成身皆生母之力也但臣一介孤寒未能自達宸聽致母苦節久淹此臣所椎心泣血不得不哀鳴于君父之前者也于是奉旨下禮部特加勅一道勅曰人子以菽水致親一日孰與國寵致親千禩乎故表節于彤管龍章而委炤於蓉城馬鬣則榮名未有旣也爾金氏力兼勞瘁味厭蓼荼踐夫臨訣之言畢已立孤之志天祿用酬于寡鵠陳情可憫乎慈烏是用贈爾爲文林郎孺人雖死猶生轉寤爲旦夫撫孤如金氏者多矣致身通顯如恩官者又不可數計也乃遭逢錫類之恩特叨加勅之榮此孝子所腐心虔禱而未可得者也可無志乎

吳明輅妻伍氏

按寧化縣志伍氏吳明輅妻年十九夫亡遺孤上手纔三月伍撫訓有成上手既補諸生旋天遺孫大用伍又撫訓如初亦補諸生而大用復喪伍一身勤劬羽翼三世長如積冬無春重陰不旦也御史李嗣京旌之

雷瀚龍妻伍氏

吳誥妾王氏

羅應濂繼室伍氏

按寧化縣志伍氏諸生雷瀚龍妻年二十龍亡遺孤禎甫週伍厲志撫孤代夫事母以孝謹聞禎以貢爲州同知伍氏年七十五卒御史喬督學周並表其門

按寧化縣志王氏王時槐女吳誥妻

年二十而誥亡遺孤近芳僅週王撫之成立旌表

按寧化縣志伍氏伍星盤女爲羅應濂繼室

年二十一夫歿撫幼子萬梧家中落爲子母家所窘伍勤苦節儉卒償宿負子亦成立

李世相妻丘氏

按寧化縣志丘氏李世相妻年二十一夫亡守節跡不踰閭撫訓藐諸嚴濟其慈中外憚肅奉爲女範遺孤日燿補弟子員縣令表其門世相弟世翰妻譔氏年二十三而寡無子誓從死竟以哀殞摯情篤義蓋丘所風也